

養
一
齋
詩
集

養一齋詩集卷第三

武進李兆洛

五律

余旣製泰始甄爲研邑之人遂珍之適秋圃再任
壽州人有以此餉者亦製爲研屬余題此

一甄珍尺璧好古意悠然莫問銅駝事聊存司馬年塵
沙俱浩劫翰墨有奇緣側耳清風頌歸裝借壓船

送鄧聖輔

相識已嫌晚暫遊情倍親新詩一回讀仙骨固無倫沅

澧思公子音容悵故人何時重握手此意各宜珍

夏辛三小照

失怙嬰孩日艱難聖善恩味餘南國笋色湛北堂萱雨
露知方渥蒿莪詎忍論如何勤護養潤葉在培根

夏循陔玻璃泉洗硯圖

只此一勺水聊療季女飢懷中紫玉段持照青玻璃仰
瞰積鐵壁俯蔭離璉枝勿放墨龍出驚起巫支祈

錢惠茲採藥圖

携得長鑱去名山任往還寄情雲物外得意藥籠間康

伯誰相識安期幸可攀
新知庭砌下芝草已凋爛
大藥求非遠軒岐或未工
黃芽青盎盎丹鼎夜融融
細辨川原地調和鉛汞中
丐君方寸七令我羽毛豐

茅簷映雪圖

杏林花未發茅屋冷難支
青眼吾垂老素心子自知
聰明賴冰雪夙夜有書詩
不念辛勤日期之得意時

四月十九日雨垞明府觀風于暨陽書院獲觀所
著紀元通考及詩稿是日快雨因賦呈

爲政培才急心期雅在茲
請觀風肆好知化雨無私竹

卸初苞籜蓮擎未吐枝塵襟欣盡滌啜茗聽論詩
述作知無敵天人罔不該四千年宇宙三萬里蓬萊書
卷隨身富宮花到處栽他時指棠舍辛柳共徘徊
此地分三壁試律以讀書三壁命題何人擅九能行廚
供白粲賜餅憶紅綾膜可金篋篋才經玉稱稱好憑雲
雨力爲爾助飛騰

種壽堂賞菊

種壽堂中菊花開又一秋見花皆識面得酒且扶頭招
客仍勞主尋歡各命儔新詩凡幾輩重與結綢繆

今年暘雨亟燥濕苦難調乞得多多種憐他漸漸凋頽
君仙指爪令我活心苗此酒當酬勞益益與細澆

今秋風日好滿放菊花顛北道舊爲主

謂巖堂

東家新

有緣東門外某氏搜竒徧老圃賣菊圃卽色問枯禪火
神廟僧况有姚監察詩心說極元餘圃二尹

處處看花好行行舊侶稀連朝成酩酊獨寐眷芳菲
樣君山路頻年處士扉但教能益壽歲歲願無違

吹伯以集見示識之以詩

身入球琳圃爬搜力豈任新詩如脫口佳處欲鏤心自

有江山助非關卷軸深秋牕披誦罷纖月下風林

久不與蒙山聚首思之頗深今年三月過我於暨
陽書院因畱之課兒子時新構屋池上觴荷弄
月殊足盤桓涉秋欲歸以詩畱別次韻爲答兼
訂其仍來九月十有七日也

世法了無染跡喧心獨幽爲兒謀結夏捉客件吟秋花
晚色猶穉蟲寒響已收買山非我事隨處足勾畱
銅官離墨下游跡久塵封念此亟行樂相看非少容
遲徊隨浪船孤負入山筇且喜今年合招携把玉蓉

偶營池上屋聊以適天真水靜諸花性林疎得月神關
心非色相引興任貪嗔頗恐驚魚樂無煩理釣綸
莫道別時暫誰言來日多祇今三五月幾遍醉顏酡此
地幸不惡如吾差可過蕭蕭搔短髻浩浩發商歌

盛君甫山子抑之以遺畫見貽予旣題詩識之抑
之又以一幅貽彥聞彥聞屬爲題之慨然復成
一詩是說夢非題畫也

南墅春蕭瑟西江月渺茫祇餘殘夢影彷彿墨花香揩
眼看雲樹回頭弔夕陽不堪重控壁望遠動迴腸

學稼圖爲朱聽菴題

耕鑿華胥世
菑畚經訓田
偶然懷沮溺
擬作散神仙
鄰父咨于耜
家兒學治螟
比庸應有耦
吾意亦忼然
幾歲瀕江潦
秋田每不成
徒令思稼實
何計富經籛
困億詩人誚
胝胼隱者情
君方志鐘鼎
無事效硜硜
寄朱肖梅

出門渾一笑
相識爲看山
嫵媚君真似
扶携我笑頑
策杖綠不淺
尊酒興非慳
料得明蟾夜
清吟日指關

貯香閣主人照

耽學精神足閒居清課專品題歸大雅翰墨有良緣眼
福誇同輩心香接古賢何時望虹氣一上米家船

題高式之照次自題韻

追憶師門侍今來四十年
兆洛年十五受業於蘿簪師
今年六十三矣先生遺澤在吾子得天全有字幸能識
于人不受憐本來清勁骨彷彿見毫顛

升沉惟俟命澗壑亦何心
鬱鬱伯通癡悠悠梁甫吟未
肥求戰勝不滓畏塵侵此意誰當會遺珠象罔尋

薛雯伯照

卷之三
薛燭予良友向予誇親家古心齊栢栢高館足烟霞舊
業經籬富新芽玉樹嘉白沙洲畔路日久往還賒
曾一瞻眉宇披圖欲惘然文孫已頭角此老未華顛好
我酸鹹外期君懷葛前何時操舴艋同煮惠山泉

舟行

平波三五里細意繪天容夕照鋪來活晴雲淡欲融光
真指寶鏡殼不動微風小艇輕搖櫓希夷會我胸

薛畫水携杖山行小照

夫子閉關久尋常不可風何期雲日好獨往碧山中樹

老如身健峯高覺道冲惜哉青玉杖未及訪空同空同
山在隴上今慶陽府境也

黃海安期宅青山太白祠何如九龍鵬小酌二泉池澗
畔多瑤草松根足伏芝無因小兒女却負向平期

湯毅堂先生官粵西方伯撫定越南阮藩入覲繪
圖紀之文孫成烈出以見示因題

至治恢無外南琛奉越裳嘉矜惟

聖主震疊任巖疆戶牖綢繆密川原旌旆長盡臣綿世
德念祖志龍光

江陰璜塘黃紹南妻朱氏結褵未百日紹南以痘
殤皆從死母家饋夏有藤枕雙氏泣曰枕雙人
隻安用此爲紹南死十日俗有所爲煞回者氏
赴門前溪水死

靜好纔三月蒼茫便九泉折釵無處卜破鏡幾時圓自
斷此生事何心再問天璜塘一帶水嗚咽自年年
最是嬌閨節而能舍命從暮春悲雨雪初夏隕芙蓉殿
颯烏棲樹淒淒馬爨封壩頭新墓碣羞煞古臨卽

題吳夫人澹齋軒詩集夫人吾友張宛鄰大令長

女也

故人傳絕學嬌女亦知音乍展吟椒句彌傷宿草心雅
懷清比玉仙侶靜調琴福慧前生業相期珠樹林

夜坐聞蛩

清商一以警獨夜賦歐陽徙倚闌干靜低徊露氣涼授
衣催卒歲撫髻感他鄉歧彼河梁女終朝亦七襄

清商一以警寂寞野人家蓬徑客旋去銀墻月已斜況
沉吟瑤瑟悄悄臥幽花顧影澹無寐殘缸搖碧紗

瘦筠携新羅山人畫卷見示卽次自題韻

卷一 詩集 卷二
和抱盞春氣高情深歲寒翺飛同栩栩芳澤各珊珊筆
借生花手毫分點易丹老懷成劇興對此感無端

五絕

題視陰負米圖爲虎林朱黠作

百里遊非遠承歡忘苦辛但堪營斗米不作折腰人

題陳琴齋鏡湖釣游圖

竹樓讀書

之子閉門居長吟只山水泠泠如振玉月色幽篁裡

小巢雅集

久矣逃虛空。蹇然可喜也。遇馱黃檗人。寄語同心者。

清溪垂釣

物我兩從容。悠然濠濮意。興得自忘鉤。魚廉亦忘餌。

鏡湖秋泛

雲水相與永。淡然忘所之。倒浸半湖山。峯影交參差。

禹穴探奇

委宛書已空。窈石字可數。如何司馬遷。獨自有千古。

雲門觀瀑

絕壑轉萬雷。兀坐如忘耦。於此觀聲音。竟得解脫否。

三江踐水

守者如固鍵遊者如脫筭於此感身世秉燭夜遊可

乘風破浪

乘風去不已惡浪高於山座中有謝士如此將無還

題郎文臺畫松下牡丹爲鄒雅存

標格雪霜勁懷抱春風深緣知德不孤見面卽見心

山水畫幀

翠嶺露深峭密林含餘清惴然思江湖散髮足平生

養一齋詩集卷第三

養一齋詩集卷第四

武進李兆洛

七律

雨後同朗岩坐墨池上

犁扶石丈不須耘蛙樂閒池頗作羣小坐風前攜勝侶
嫩晴天氣足清芬亂紅空想亭邊雨池邊一亭舊名紅
雨今易其榜矣濃綠全鋪水面雲于此從容弄柔翰令
人絕憶右將軍

寄趙萼坡

我識詞人趙倚樓卞和山畔賦依劉驚心已是十年別
見說蕭然兩鬢秋鋤徑課花隨處好眠雲跂石幾時酬
籬邊叢菊開無數飲興能如舊日不

道光十年九月廿四日偕吳山子育莊子定潤觀

菊于雲亭季氏主人畱飲卽席賦此

主人合是培才手佳友都爲悅已容慚愧衰顏陪衆嫗
便思相伴作花農天殊不放秋心淡客亦爭憐酒味濃
多謝好懷無以報約君看我冷芙蓉

江城幾處菊爲叢花到君家覺不同眼底遂成花世界

人間無此錦屏風九光十色徘徊見儼白妃青位置工
難得今朝風日好老天有意向衰翁

乙未重九夏周諸生挈榼携肴邀子鳶箴山兩廣
文及予小飲聚星樓鄭君樵仲適至子鳶以詩
紀之次原韻

千林風葉下如潮天半秋心不可招閣小猶嫌混城市
興高便擬上雲霄携樽有伴無前約聯轡能來若互邀
更喜故人從遠至衰顏驚看舊丰標樵仲遊浙久不相

見矣

徐小尙以豐樂亭前歐陽公遺竹製筆筒見寄侑之以詩輒依韻爲謝

碧筠五寸玉無價雅詠一篇珠在前淪落合憐幽壑底
流傳說自醉翁年暫經詞客裁新管絕似柯亭得舊椽
拜賜欣然滋內愧瓣香何敢望名賢

題黃石齋先生自書詩卷後卽用首篇原韻

此心祇要問醒瞋誇說甞皮已枉然大海波瀾廻便濶
神龍指爪露時偏孔顏有道通三極蘇李何曾值一錢
可惜摩挲向陳迹誰能融會性中天

壽趙尹言

兩情白首尙如新得晤言時勝飲醇久已炎涼忘世味
總于平淡發天真拈花弄草生機足清酒深杯樂意伸
何必更教杪稊序胸無塵土卽仙人

從今自署古稀翁行樂催人秉燭中好覓短筇尋向予
早營生壙學司空知君腰脚還如舊屈指朋遊已不同
我趁壽筵來索酒愛他春日暖童童

正月四日訪張懷白聞薛雯伯方稱七十觴回舟
赴之未至塘頭十里許而冰合北風又厲步不

能前舟中無俚率成二律俟至江陰寄之

我識塘頭薛夫子玉顏冲粹老經師同文細辨焉烏舛
長歷精推朔閏差杖國儀型真不忝擁臯諄誨未曾疲
朝廷旦晚求轅伏好護輝山媚澤姿

便擬登堂索春酒無端水凍滯河干生煙濕葦艱爲疊
和水村醪不敵寒華館開筵想歡暢剡谿乘興遂闌珊
神山風便吹詩去好博安期拍手看

三月十二日遊常熟破山寺

花能明艷柳能嬌暫與如來破寂寥龍去尙餘今澗谷

蓮開苦憶舊根苗坐無開士談三地壁有詩人話六朝
門外雙幢最殊絕坐看便擬永今朝

胡墨莊

承琪

以詩招遊水西次韻奉答

碧落紅塵各一寰幾人燒汞得丹還從容銘鼎都忘我
檢點藏書自有山要接精神周孔後更勞疏淪鄭毛間
君著儀禮古今文疏義小爾雅義証台衡指顧遊偏倦
養疴歸來鬢未斑

眼前埃壘幾能清乘嶠居然到赤城白也舊尋棲足處
琴仙幸有拍肩情桃花流水長無恙綠酒深杯愧此生

何必看山定黃海胸中五岳久能平

酬翟潤之漱芳

潭上紅桃未着花我來何處可停車得君卷裡千篇玉
勝看岩頭十丈霞東魯門牆資翊衛君著文廟通考百
餘卷南湘屈宋枉分衙寄公舊有遺民在許買芳鄰擬
住家

酬吳茲山

此間誰敢鬪詩才李白當年屢往迴長史庭階雙鶴舞
汪生池館百花開似君清韻差肩好媿我相逢歛手推

早晚金聲聽擲地興公努力賦天台

次韻酬費星甫

聞道東峯尙有亭名流觴詠幾人經
閒雲暫住山仍碧
新雨相逢眼倍青
君似枯禪能不寐
我如中酒每空醒
最嫌對字居旬日
燈火疎簾隔一櫺

留別涇川書院諸生

春風吹綠漲芳汀
高會羣仙濺玉亭
赤鯉白龍爭逐我
三門六刺不曾停
徒慙坡老成饕餮
諸公索拙書各有
潤筆東坡所謂一路餓遺受之若饕餮然畧似樊川半

醉醒收之水西寺詩半醒半醉三日留一笑凌雲暫分
手桃花未放柳條青

祁生辭官將歸先寄我一詩甚喜之乃人未還而
計在門矣念之愴絕次原韻

破例相迎事若何原詩料得我歸應破例入城一度許
經過傳來惡耗竟非訛新詩自是人間少舊友而今地
下多華屋况經成浩劫故居已燬於火西州那復慟行
歌曹騰老眼空吟望枉却堂堂白日過

道光戊子春子雅先生來權暨陽廣文遂獲朝夕

比冬將去以詩見貽次韻誌別

詞條葩瓊自紛紛正叔風流見替人此地江山供玉麈
知君竿木鎮隨身蠶鹽暫領三分味桃李聊沾一半春
笑我寒毡同蟄伏白頭真喜結交新

山色蒼茫水遡綿
竭來幾度共瓊筵
尋常譚藝供消日
珍重詩篇愧引年
盤菹乍辭經義舍
寬裳竚詠大羅仙
梅花將發君方去
此後相思孰與傳

鮑聯甫退思圖

每誦委蛇退食詩
道參損益想風規
螭坳待漏鳴珂候

岱麓頽春露晷時齋閣清嚴無客到焚香心事有天知
會看翔步星辰際

秘殿從容展論思

木芙蓉酬季僊九韻

比似秋心幾百端衰顏借酒暫爲歡無邊葦岸飛晴雪
何處花城號錦官明鏡已教辭曉艷青要肯與伴宵寒
佯羞却背無聊甚博得君來四面看

碧樹全成錦樹林夕陽影裡涉還深啼痕未斷雙紅臉
裙綯都如百結心無恙江潭悵搖落多情鷗鷺漫招尋

日邊紅杏勞留盼辜負春風直到今

次韻答仙九留別

天回義舸作吟艫繞膝歡然勝板輿臣朔無憂一囊粟
米船却受半倉書卽今細雨開帆處便是長風破浪初
屈指春明櫻笋熟覓裳舊侶盛簪裾

太息牛衣往事遷京師誰似仲卿賢金花帖好從人羨
玉鏡臺空黯自憐阿杜釵裙原婉淑寧馨頭角已完全
微之鳳閣平章事一酺韋孃定韞然

經籛遺澤有誰同雲樣文章捧日紅已是一鳴暗衆鳥

無端六博借神叢河陽見說思騎省鄉里于今頌德公
努力修名寶餘慶瀧阡勒表待題崇

私喜相逢意氣投幾番望遠苦登樓羣空冀北君誰讓
步失邯鄲我不羞素業殷勤貽一縷錦衣延佇唱三侯
神山蓄意相迎待早與仙班證十洲

年時月夕共花辰挈侶携朋色笑真矯首天邊分去雁
回頭地下有陳人可憐幾輩青松晚所望一枝紅杏春
來歲折梅遲驛使短檐獨自百回巡

落花

翡翠窗櫺素錦糊更誰十斛費明珠也知剪綵都能似
不信還丹別有符憐慰好言聽未慣色香觸法本來無
一年一劫拚如此補種溪頭十萬株

高翔之東籬採菊圖

小時相伴讀書聞壯日奔馳相背飛垂老論心朝夕共
舊游屈指似君稀未荒徑草堪招隱如此秋容勸息機
正是籬邊新酒熟夕陽携手好同歸

觀蓮小集歲以爲常昨歲酒徒寥落飲旣少歡唱
酬遂闕權輿不繼恐爲花羞先以糝糠敢求珠

玉

樂聞世界有清涼
衰至生憎赤日長
占破幾弓閒地步
消磨兩月熱天光
老夫坐對心如水
君子能來語亦香
杯酒易空花易謝
但堪謀醉準千觴

侵曉徘徊綠玉堆
憑闌細數幾玫瑰
風擎一一披帷見
波定雙雙對鏡開
墮粉已漂還弄色
含苞未吐底須催
選真暫結跣趺坐
卽此何如九品臺

屈指栽來五度花
一花一飲一咨嗟
無多酒伴垂垂盡
比似秋心漸漸賒
數遍晨星待朝露
補邀新雨散餘霞

祝花兼祝看花客相對朱顏歲歲誇

向來藏拙避人先學舌甘爲小乘禪偶效野人投木李
浪希彼美步金蓮非操斗酒生奢望倘爲名花與拂箋
昨夜池塘微雨過一尊莫負早涼天

寄題陶雲汀中丞皖山大觀圖

江勢東奔欲撼城連山北折與江爭登臨便有投鞭想
形勝非徒半壁撐當日干戈餘舊跡祇今草樹識威名
遙知旌旆臨飛觀懷古悠然動遠情

和王崧甫韻

無端玉戲鬧天工好是來思句未終逕斷閉門人寂寂
詩成當酒暖童童自誇徒手猶能戰却道吟肩不可風
莫待明朝賈餘勇疎林已掛夕陽紅

銷金帳底那分春楮袖爐邊袖手巡我是粘泥畱絮影
君真善舞上珠塵時晴帖喜義之到斗酒詩憑白也論
不恨歸期遲一日沙邊鴻爪總良因

曹金門芝蘭雅契圖

琴停筆倦坐松楸却課兒童種翠苔綠葉素枝思澧浦
澹雲微雨做花朝同心言倘能如此一瓣香知定不消

好是階庭森玉樹涉江未悵路迢迢

送崧甫

淝水東津別八公重逢屈指一星終訝卿繞隊鬚鬚長
愧我循顛漸漸童頗惜回谿仍揚翅崧甫舉拔萃科廷
試已得復失相期窮髮更培風頻番酒盞同持處稍爲
衰顏坐褪紅

又說歸期指仲春十三弦望一逡巡大江浩浩朝滄海
虛宇寥寥絕點塵風月無邊隨領取文章有價不須論
來秋擬泛秦淮棹倘復相逢也宿因

永貽以行看子求題且曰必爲勵學之語戲反其
意拈此解人當知卽此是學耳

先生老矣拋書坐子好遊乎語子游叙水鉞山千徑絕
落花啼鳥一庭幽幻來魂夢周蓬島靜裡堂坳辨堅舟
知否現前天趣足莫鑽故紙枉埋頭

蕨根以四貧詩見示戲和之

蕭騷大樹北風高補綻行間舊戰袍甯可忍飢肥櫪馬
未拚縱飲典霜刀紇干雀豈無生處原野烏嫌去子逃
要待沙蟲消化盡自將鐵骨與天鏖

貧府

袖短知寒各自任相憐同病可同心荔枝圖好餐難飽
編紵衣單冷不禁或有子興能裹飯想無鮑叔與分金
憑君莫笑秋雲薄葛帳西華怨更深貧友

但有屢屨與伏雌此情已勝泣牛衣半牀斜覆黔婁被
十索空成妙好詩妾是謫仙工辟穀卿眞餐秀欲忘飢
他年十萬營齋奠也算韋嬾得意時貧妻

何曾夾券石崇來日日柴門掃雪開主或憐飢免笞罵
人誰拭目擬方回飯符腹大眞成負藿肉兒多未許陪
但使郎君遇紅拂猶堪距躍効微才貧僕

題甫山盛君惇大遺墨

君與予爲兄弟交甚厚自珍其畫諸我作佳畫
當報玖竟不果去年甫山捐館予往哭之追陳
曩悰遂及斯語令予思竊檢遺篋得此貽焉畫
似未成名亦未署因題數語以識思竊字抑之
從予游者也

想見含毫意渺然熏來剩馥枉流連十年梁月相思處
一樣雲山未了緣景物定知非隴首心魂了是滯江天
怱怱歸老成何事不及誅茅畫輞川

江畔意行圖

老屋江城住畫圖緣江路熟每相於山圍疊嶂樵踪斷
水接長天帆影孤童荷青琴思選石樹連濃綠指前途
襟懷此地能空闊乘興歸來日欲晡

輓劉眉峯

卽鵬峯改字

四月中爲劉君題照至十月中而遽歸道山聞
之不勝感喟君與予同庚也

文心勃鬱奮春雷奇氣縱橫壓酒杯低首青燈事鉛槧
回頭白髮向蒿萊如何身世匆匆了剩有肝腸寸寸灰

信否城東仙觀路故人携手訪紅梅君秋中夢常聘
君逸遊毘陵紅梅閣君辭以事聘君笑曰君不久終當
去也青雲挈侶信有之乎

壽劉箴山先生五十

興來何處酒杯深頗有劉安識我心飽飯且須栽苜蓿
素懷真喜附苔岑眼前雛鳳飛騰意江上閒鷗浩蕩吟
一飲無名借稱壽菊英桂粟等黃金先生誕辰九月十
五日以今年鄉試收期諸生後前一月預祝

屋邊自闢地三弓鑿徑安門便過從展卷風揉蕉葉碎

吟香雨助藕花濃
驚人白浪通銀漢
向我青山幾玉蓉
九月蟹肥秋更好
索郎重與倒千鐘

姚古愚狎鷗軒校書圖

杜陵舍北淨蒼苔
春水閒鷗日日來
剩有詩篇拈已懶
只饒書卷眼能開
愁心白髮幾千丈
笑口青州三百杯
遺稿至今零落否
好憑子幼爲傳來
朱君肖梅先生外
孫也實奉遺照索題

讀高麗洪濬園國相詩集

高麗對國本朝鮮
訪範開周不計年
自昔稱藩文教接

祇今入貢禮儀虔卷中琢句箋應貴海外陳詩相果賢
遙想

帝天雲日爛丹邱歸去富新篇

清遊何必羨蒼陂江國菰蘆此一奇占得野鷗閒浦溆
聚來耆舊盛文詞闌珊幾卷同人集寂寞三間老佛祠
太息繪聲空繪水有誰論飲更論詩

錢武肅王遺像錢氏二十九世孫若浩繪摹本

時危唾手奏膚功袞冕先窺石鏡中鉞券丹書新社稷
錦裘駿馬舊英雄子孫此日稱清第祠廟當年說表忠

百世尙瞻遺像在披圖彷彿大王風

生甫毛君以西礪明府招飲凌霄花下原韻疊韻

見貽卽依韻奉答

久憐清瑟滑奸濫今見金篦刮瞽冥煎改紅爐青氣竭
機神白地錦光開多多益辦非關學草草能工詎是才
製作此時須大手可應解帶賦條枚

此生頗類捐溝節卅載空挑短檠良聊免細腰隨柳折
有時笑口爲花開王駘何物能尊足匠石奚宜顧不才
壇坫雍容師以律願隨斯養事行枚

再疊韻附呈西礪明府

頑金歸冶鎔爲水鍊火生雲黯似炎世垢欲求風后掃
寶山只爲至誠開性靈陶澤無餘事宇宙兼包有別才
最感古懷敦鮑叔此恩何止計朋枚

明府原唱有交誼

豈今無鮑叔之句漢書貝二枚爲朋

西礪明府再用哀字韻枉贈復依韻答之

天衣任著千花朶粉壁難安一點哀上客喜陪王幕集
凡鱗驚見禹門開得緣蓀正稱同味豈有萊蓬可論才
鯨吼竟爲蕤卽發瞿然圖視數閒枚

汪瑞峯小影

盤跚趺坐意殊豪疑隱疑仙任汝曹常自握中留一子
是誰頰上寫三毫紅情欲與江楓落幽意真如削壁高
笑我倚枰餘十載長柯腰下尙堅牢

題某照

翛然興味老彌腴策步何須綠玉扶雙髻風前如野鶴
一毛膝下見鵝雛早栽彭澤花三徑補種東坡柑兩株
莫道荀家文若小會看重繪德星圖

題高申之承錫小影

回憶當年立雪時君方總角效兒嬉
鬚眉轉盼今如此
渺莽前程那可知
照眼花枝偏兀傲
頻來倚徙訴襟期
歲寒願與長相耐
領畧春光未是遲

贈祝子常

紅瘦綠肥不足言
最難濃淡總天然
陶鎔功在披沙外
意匠詞爭下筆前
幾輩詩壇盟敢主
一時花鄂集同傳
蹇人空有登天願
何路蓬瀛問列仙

題照

漫吟伐輻置清漣
荒落何曾比輞川
年去始慙三寸學

貧餘猶剩一雙田元卿開徑遲求仲少府真遷望薛宣
來夢亭圖感珍意他時當繪子猷船

題某照

每向里碑聞道賜暫從圖畫識泉明長身且喜松無恙
送老偏於菊有情好句閉門誰共賞濁膠對飲只頻傾
可知渺渺沅湘汴多少秋人想落英

石灣

石灣仙嶠看秋濤何處游能似此豪直是胸中無宿物
果然身外等鴻毛峭帆逐浪滔滔逝寒樹憑山落落高

欲御天風還未得歸來隨意倒村膠

贈友

芙蓉湖畔鯉山邊中有幽人享大年
錦里尙慳瞻道貌吟編先與結閒緣
琴尊以外無他嗜矍鑠哉翁不羨仙
陶冶性靈成解脫怪他情味向詩偏

蕭子滂

以需

携酒挈客飲我於暨陽書院次日將

治酌相酬雨阻不果子滂以詩見貽依韻奉答
客夢今朝也台醒積雲容易見疏星撩人花尙參差發
向我山都嫵媚青尊酒盈盈誰是主黃魚頓頓不嫌腥

憑君莫問江潮事水滿濠梁儘闖萍

自笑支離那可醫跼蹐窺影井瀾時老慳樓護侯鯖慣
憎貌楊修暑賦遲恰是浮陰阻良會又教健筆走新詩
感君相愛無窮意小別殷勤訂後期

壽魏從母奚太孺人八十

靜敞璇闈肆綺筵遲遲春日正暄妍擊鮮事膳茅容孝
負米承歡季子賢繞砌孫枝排玉笋一門羣從蔚金莖
雲溪溪水添新綠好變醲醪酌列仙

外家門望嗣賢梯諸舅森然氣吐霓此日瞻依惟從母

小時襁褓憶提携艱難閱過滄桑似祉福真宜山斗齊
差喜老甥頭白盡得隨兒輩戲中閨

養一齋詩集卷第四

養一齋詩集卷第五

武進李兆洛

七絕

周忠介公不聞能畫而此幀已盡六法之長嚴氣
正性流溢楮墨公固意不在畫也釋題識可見
系之以詩公自題云近溪幽濕處全借墨華濃
唐人此語真所謂詩中畫也偶寫數筆覺滿處
冷光又非畫中詩也天啟四年春分日寫於石

湖舟次

廣平鐵石賦梅花猶是天斜着麗葩何似胸中邱壑在
滿空霜氣出槎枒

題畫己卯九月謁蘿簪師于含山學舍命賦

峯容慘澹樹離奇問字人過花滿籬三斗醇醪數宵雨
褒禪山下正秋時

小游仙次陸祁生韻卽寄祁生皖江

寫意難窮百幅箋敢云出處竟關天酒人自有荆卿在
何必田光尙少年

小寅以詩索瓢硯製此爲報

自揩泥土剔苔斑千五百年緣未慳得傍青氈親晤語
底如片石在寒山

題于邠硯

蠹材古貌野人姿謦詠田園鎮自宜帶玉腰金多少客
任他奪取鳳凰池

南陵同陳芸暉閒眺

故園別去幾經年日日思歸枉自牽柳已搓黃波已綠
雲山東望一凄然

榜題猶記曲江公軒檻空餘想像中剩有百年喬木在

卷一 夢言 名三
可能管領舊春風

皮癥條剝苦槎枒鐵骨憑將閱歲華底事欲開偏緩緩
自嫌身是路傍花

只爲尋花不自疑便穿苔徑倚花枝何如坡老黃州日
拄杖敲門看竹時

鄭春山爲邵百一繪采芝圖小影囑余題句而其
圖不在行篋圖中人予識之繪圖之人予識之
奚必見圖也百一方有北行兼以爲別

便從畫裡避埃氛何日還山穩臥雲好向圖中添箇我

長鑱木柄鎮隨君

次鄧聖輔畱別韻

自怪秋來少醉眠
幾多鄉思雁聲邊
我家也傍江湖住
安得攜裝共一船

薛萍薌春夜家園共宴圖

一飲團圓四代人
好花好月好陽春
便疑此是華胥國
他日歸來欲買鄰

依舊春園畫裡身
蹇驢獨自犯霜晨
可應略識征人味
早辦陶家漉酒巾

又菴夏先生度汪薛先生並重遊泮宮索詩記之
同人多頌禱之詞非二君意也故爲其自言時
道光丙申

莫道儒冠悞此身中和培養是天民此生不愧稱黃耇
後進相攜拜聖人

樞衣當日共羣賢稽拜階前展豆遵六十年來頻屈指
榮枯幾許荷陶甄

白頭攜手進新賢問樂多慚魯兩生德幸不孤稱自好
好從逾邁策修名

題龐靜園遺照

亭臯霜樹徧丹黃
領畧秋光過野塘
獨自意行還意立
眼前雲水儘蒼茫

譚空自昔推居士
令望何人拜德公
剩有里中碑在口
能傳清白是家風

題張春槎司馬蝶花樓詞稿

自製新詞韻最嬌
白石句青衫司馬鎮無聊
不知柳院梅廳夜
可有愁魂真箇消

當年陸弟譜清鄰
淡月疎風聽漏頻
遺跡尙餘新顧也

卷一 齊言集 卷三
秋墳誰唱御樓春卷中有祁生規墨振觸舊遊輒及有
祁生所填詞名清鄰

冬夜

窗前一樹九英梅但是寒來香亦來夢裡五更鐘打罷
塵埃暫覺豁然開

梅道人畫竹

抱節先生道不孤幽踪落落韻疎疎寫真何減文夫子
影落空亭入興初

元人畫弄璋圖

藍田一點玉根苗脫襖擎來雪樣嬌此日莫愁真得意
安排繡鬢待來朝

李地山香田夫人遺照

可人夫壻百相宜寫罷雙蛾更搆思想見水晶簾底下
春風鬢影看多時

當日看花同解語今來對面只無言祇憐一瞥驚鴻影
回首前塵已惘然

余從弟北池作畫嘗屬予題而未果壬午第沒予
每展此畫欲一着語輒泣然擱筆已迨崦嵫日

抱憂生之戚乙未初冬上冢錫山舟經白蕩根
觸畫意聊成此

老漁生長水雲鄉每到秋來飲興長最愛平湖疎樹裡
扁舟領畧好山光

吟詩弄筆送殘秋十五年來無此遊一樹衰楊扶夕照
倚筇何處望歸舟

尋常行樂記當年畫裡分明卽眼前山是九龍溪五瀉
一回經過一流連

觀菊裴氏

却爲尋花放酒杯菊花堆裡暫徘徊不容滿把採之去
醉裡尋思夢裡來

觀菊陳氏

黃黃白白列東西小小排當儘自宜可喜主人能養茗
却扶殘醉與題詩

題飯信圖

周東村飯信圖毛生甫所藏予嘉其英越哀護
神爽若接屬吳冠英摹而存之

中山得志一壺殮當厄由來易感恩推食甘爲漢王死

千金報母笑王孫

王孫善保千金軀四百炎靈此一盂可惜敖倉無萬粟
秋郊鬼母哭嗚嗚

嗚嗚莫作餓夫啼眼孔人人亭長妻豈有英雄肯嘗食
大慈悲相見眉梨

眉梨龐首意低徊畫作王孫絕可哀想到朝餐空伍噲
母兮心事也應灰

蔣我涇適園詩草

善戰何妨驅市人詠辭脫口便生新粗枝大葉君無笑

古直從來見性真

酒虎曾聞是虎癡而今學道懶傾卮要人領畧杯中趣
補盡淵明飲酒詩

詩人風義只和平琴辨悄悄指外聲獨奉隨園香一瓣
莫誇才力壓新城

江上吟窩舊草堂兩髯各自一軍張廣文遠宦徵君死
三徑從今莫放荒

沙詠亭愛吾廬詩草

一庭清露引新桐把卷閒吟綠影中盡得風流在何處

天工本是不求工

消遣流光聊乞祿
破除鞅掌只吟詩
且欣松菊歸來早
風月無邊任總持

爭盟孰與上騷壇
白雪從來屬和難
可惜鍾期遽仙去
洋洋流水爲誰彈
荷中多薇初隨卿評跋故言

夏循陔拾蠨圖

出處當從元凱論
暫尋蠨蟻向淮濱
便教作盡鰭鰓躍
人道吳兒是木人

陳堯羹擔糞圖

坡公但不能擔糞吾子多才并此能矢溺果然知道在
鼻根一悟徹三乘

自信雙肩皮骨牢何妨竟赴老農招心田正要勤勤糞
此擔還須努力挑

生雲垂露之軒紅藻甚放吳生冠英攜所畫幅屬
題因成二絕道光乙未六月八日

不着塵埃些子兒前身端合住瑤池冰肌玉骨清無汗
彷彿摩訶未寢時

淡粧濃抹總天然色相同參自在禪箇裡一枝偎倚處

分明邢尹門嬋娟

顧侍萱廣文中流自在圖

不論遇坎與乘流把柂堅牢得自由如此渡河安穩甚
底須紫玉奏箜篌

莫問前途速也遲布帆無恙且安之會看萬里長風發
始是宗生破浪時

蝴蝶階間自在飛如舟學舍稱其碩絕嗤仲御鷓鴣躍
誇說吳兒賣藥歸

不作風波於世上別有天地非人間領得此中閒意趣

翛然身外百無關

補甕圖

田功未收酒無粕老甕多時擲籬脚
場登新秫黃雞肥收拾將來貯桑落

題潘雲閣耀文敦素堂詩集

墻頭一角遠山眉春入遙林綠意滋
正是雪消烟歛候石欄啜茗讀君詩

此地幽棲足澗遶林泉佳處自牽蘿
桃花潭水無今古例有詩人解踏歌

題胡墨莊詩集後

披珠撿玉自沈吟芳草天涯共此心
持比澄潭千尺水一番相見一番深

賞溪溪水碧潺潺問渡尋幽興未慳
日日關山聽春雨可憐孤負水西山

雲龍那得鎮相隨贏得隨身數首詩
擁糴長吟歸去也桃花未放水生遲
君枉贈之句

陳芝房攜其尊人吉甫大令詩卷見示
敬題卷尾自有清風葉葉傳鄉邦俎豆
仰名賢橫江先生祀邑忠

義祠尋常草木皆文獻况是親承手澤綿

有明中葉盛文章江左家家翰墨香想見當年師友輩

左宮右社儘璵璠

卷中袁胥臺乃橫江先生師

三百年來世德垂季常名跡重當時每看隴首秋雲字

章草徒成宿草悲

吉甫曾爲予書扇頭

風雅而今又屬君典型珍重寄斯文好將事業承弓冶
莫漫徒收翰墨勛

張

集其尊人莘農先生交遊往復之書裝爲

一冊携以相示冊中諸人皆予所識今盡歸鬼

錄獨予在耳愴然識之

秋墳宿草廿年餘有子忻能讀父書似此朋儕天下少
不知地下更何如

卷裏相逢盡故人祇餘憔悴苦吟身循顛一晌成長嘆
月缺花殘孰共論

鄒北江印譜

尉律荒來繆篆煙但從秦璽認蹄筌紛紛摹畫工續密
知否曾窺許氏篇

師今師古了無憑高雅全資意匠能妙會自然通造化

解人安得李陽冰

猩泥紅艾細摩挲此事名山共不磨只向鋒端問消息
莫將軟媚笑文何

題錫山女士鄒蕊珠蕙貞詩稿

詩有仙心謫亦疑集中句分明手自寫真詩可知紫玉
如烟日便是飛瓊謫滿時

何云女子合無才卷耳條枚試讀來不肯綺羅埋沒却
此言幾輩愧於思

劉晨容易住天台月墮星沈自古哀長史那如蕭史福

玉臺不作鳳凰臺

次韻酬問亭

一尊銷夏賞新荷轉瞬韶光有幾何紅粉房空蠅蛄弔
最憐池館得秋多

却喚昌宗起九京招涼亭子尙三庚不教水面平鋪著
與建霞標上赤城

笑我與花成目逆惟君於我最相親君今說著將歸去
花也淒然背着人

兩邊青土與蒼官兀冪如將冷眼看只要花開人好在

世間萬事底相干

再次韻酬崧甫

記得同看碧沼荷拈題分韻飲無何誰拈紅粉粘枝上
又占秋光一倍多

流霞萬點散瑤京恰是初弦月出庚江畔靈均憔悴否
有人錯比曼卿城

不必褰裳畏濡足攀條相看越相親祇今喜共秋江采
他日誰貽遠道人

不是芙蓉闕下官一羣鷗鷺與同看憑君莫作媒勞恨

我亦頻年愧段干

寄吳石華

蘭修粵東

白華無恙笋初生料理長饒共野垠
我亦新來解鋤地長沮可許耦而耕

佛桑花下款門初幾遍披函走蠹魚
一年一度一緘書

砑羅紅襯藐姑肌香沁心田冷沁脾
幾日炎風愁內熱憶君直似憶離支

許某故吾今我圖

故吾今我剎那間歲月堂堂去等閒會得觀河無異見
眞常本性底相干

莫道衰顏不再紅八公倏忽又兒童君家舊住神仙籍
試問東山玉斧翁

送孫廣文

把酒論文春復春吹來舊雨豈無因便應小住三千歲
長與山人作主人

當年沙曲候龐公一室香清曉霽風見說年來尙強健
眉龐童綠玉顏紅

苦言省侍有前期親舍遙瞻意若癡
紆組未幾還解組
伊人空溯水之湄

太息雙丸不得閒別何容易見應難
從今三徑緣誰掃
擬共山僧學閉關

題友人遺照

磷磷澗石細苔皴謾謾長松太古春
聽水聽風成世界
一邱一壑見斯人

更誰寂寞與求音逝者如斯愴已深
料得而今磐石下
亂泉不復寫鳴琴

太倉王氏園稱名勝舊有梅三四百樹今已蕪廢
僅存一梅或題之曰瘦鶴六安程芳墅爲之寫
圖以乞詩於當代名公積數年題者幾遍海內
卷大如牛腰携以索詩因題二絕句

白雲流水渺空山翠羽啁啁夢已還此鶴有時終化去
得畱清影在人間

王家幾百梅花樹三百年來瘦鶴存卷裡新詩亦無數
他年誰似老梅根

一壑風烟圖爲雁峯題

養一齋詩集

卷五

風低烟歛艇徐牽一壑胸中尙了然痛惜勾留莊上屋
當年未辦買山錢潼渚東有溝頭莊傍銅官之麓水木
明瑟居者求舊予擬卜居而易其名曰勾留卒不果

戲題圍棋筒

風清月白舊相思林下諸賢把臂時歛子推枰渾一笑
羅胸星宿有誰知

此中韜畧是誰精橘叟沈吟意未平輸却玉龍都不管
但畱鱗甲貯殘兵

筆筒刻菜二首

文園定比菜園奇
青紫紛紛拾芥宜
人士自應知此味
清班玉笋試掄之

夢中漫說有花開
誰是明光起草才
要使斯民無此色
筆端奪得化工來

前題

鴻筆由來說雲雨
束之高閣暫沉冥
此生蔬笋緣長合
一任圖形入汗青

示包慎伯

世臣

周保緒

濟

當年鄒魯盛門徒
君子由來德不孤
多事史臣題道學

至今詬病到儒書

魏公不了中原事同甫亦非天下才
廬阜幔亭依舊好傍花隨柳且歸來

古畫

縱橫凌亂盡情開着手成春有此才
生氣居然能遠出筆端奪得化工來

寥落秋心入廢園白頭宮女說開元
此情可待成追憶一朶花看一淚痕

道光甲午三月張子琴秀才招同劉箴山學博張

懷白吳冠英遊虞山下榻朱遠翔少府家口占
以贈

有草有花閒院宇疑仙疑隱古鬚眉肯分一榻容安卧
明日遊山借杖藜

李仙槎泛槎圖

芒屨踏破九州烟衣帶圖將五岳篇天下名山都眼底
世間何處說神仙

奇情真足助文瀾似與煙雲相往還我向卷中成坐臥
看詩看畫當看山

自笑頻年汗漫游
渾忘大小九浮州
扶搖枝上仙仙意
倘爲雲將一掉頭

孫納菴荆麓消夏圖

長淮淼淼盪胸來
古木陰中石屋開
記得去年銷夏處
合瓢泉畔買菱回
合瓢泉在懷遠西山

史湘亭出蕪虛谷畫竹見示因題

幾年不見蘇虛谷
見說侵尋老病深
懷裏琅玕猶無恙
與君共保歲寒心

曉風殘月圖

秋心振撥浣花牋酒醒今朝事惘然一種風懷兼別緒
就中拈出柳屯田

蒼茫夜氣總模糊浩蕩心情會得無聞道鴛湖好煙水
詩人本住小長蘆

劉箴山廣文湖濱垂釣圖

當年作計未全非深柳書堂傍釣磯開過桃花春水活
一竿常趁鰕魚肥

而今往往金生魚如此蹄涔結網辜好趁青天一鉤月
繪君滄海釣鰕圖

小綠天盦拜素圖

今日維那拜顛素素師當日拜張顛若將此事從頭問
倉史而還幾聖賢

初寫千文智永師賺來褰帖是神芝鐵門限裏曾遊未
問取廬山面壁時

筆禪何處索端倪深淺空量墨海蠡妙會神完兼守固
高閑只合拜昌黎

當時一幅醉僧圖絕叫淋漓快發舒智過其師乃傳法
大師飲興竟何如

張芙川小瑯嬛館藏書圖

何必名山始可藏
清華水木讀書堂
夢遊祇惜無斯福
一晌披圖意渺茫

平生積得八千卷子
和先生句恢廓孫謀
幾倍之物聚
固常於所好也緣世
德與涵滋

老去時時爲借書
一綆不挈載兼輿
世人莫道瑯嬛小
鄴架曹倉定不如

綿綿瓜瓞圖

侍護廣文以商瞿之年
初獲石麟彌月之宴吳

獻常寫此以賀歡喜敬題

九霄膏露湛含津
霑灑芳根引蔓新
從此朝陽輝五色
長教四面會嘉賓

盛青厓日出圖小影

仙山樓樹俯天池
平看踰烏浴羽時
翹首青雲真咫尺
扶桑檢取掛弓枝

劉心畬採芝圖

百草千花滿意收
十分春色眼前頭
握中劖得靈芝在
管領東風汗漫遊

霜上髭鬚雪上顛神仙富貴兩茫然憑君且快屠門嚼
一晌華胥國裏天

記否涵虛小徑斜花開挈伴拓牕紗而今各各垂垂老
怎及花花歲歲花

邵寶鏞菜圃自怡小影

畫裏相看倍黯然卅年相識各華顛東陵饒有家風在
檢點黃齏過晚年

尺地堪鋤便自鋤竹間桐下儘相於世人買菜多求益
莫種芸薇紫色蔬

題雙美閣吟稿

琴川水合有琴心閣閣風流得嗣音一瓣隨園香未沫
祇今女士總如林

夙世靈山並命禽迦陵清韻最悵悵美人畢竟難消受
集中句可是檀奴福分深

漫成

絕代才人盡網羅千秋低首拜維摩錦標珍暉誰持贈
遮莫人間有選哥

題畫

疏竹修梧色色清此時把卷意回縈無邊風月供渲染
只有秋心寫不成

不辨雲根與樹根閒吟閒坐共誰論似愁今夜西風急
金井飄殘月一痕

中年絲竹好歡娛早歲西華白已徂寶劍紅粧都入手
可能消遣不平無

儘教愁思怨關山剩粉零紅滿意刪便向旗亭矜畫壁
世間安得有雙鬟

贈友

鴻都渺矣剩開成後輩研經合稟程重與拾遺兼補藝
小長蘆後此書生

青楊何妥舊知名今見鏗鏘楊子行合記殺青題口日
受風多處是蓬瀛

題某總戎照

草樹雲煙座裏看酒腸合似大江寬孫郎帳下兒都健
齊築詩壇作將壇

南徐買酒幾經過未拜戎旂一醉歌瓜步江聲連北固
新來飲興竟如何

淵雅堂還嗣彩堂一家述作盛文章渺然人物成嗟悵
又爲元方惜季方

紅藥聊隨百草薰冶春唱罷漫尋雲橋邊剩有吹簫侶
古取揚州月二分

無多喬幄隔雲霄雨過星沉影寂寥忽漫隨風飄一葉
有人彩筆與雙描

詠史

唐代諸方勸農使漢家丞相富民侯莫言汜勝齊民術
一冊幽風實造周

錢生榕初天女散花圖

漫說一花都不着可憐鎮日在花中手忙腳亂何時了
那及天門奉帝童

張子琴得管夫人手寫璇璣圖并讀法末附武后
紀事字細如絲髮而圓勁妍和甚可玩後有仇
十洲繪圖別一卷分織錦寄書來迎三節密麗
精美亦尤物也予不能別其真贋而愛其字迹
屬孔君省吾入石而題三絕句于後

尋常閨閣說多才歌舞何如染翰來一樣蛾眉成棄擲

更無人惜趙陽臺

一篇讀罷錦中花立遣迎來油碧車真是賢賢能易色
連波何必減秦嘉

風琴雅管奏斯音豈有褊衷妬抱衾定是看朱成碧者
妄將毒腹揣明心

題元刻蔡傳旁通後

講章家每爭朱義藏弄家偏競宋刊我是兩家門外漢
但沽古澤一成歡

養一齋詩集卷第五